

*Rebiba Festival di Siglo-bieuw***Aruba Ta Celebra Carnaval**

Cu un balente celebracion, Aruba a caba di tuma "despedida for di carni," diablo, luho y vanidad y a cuminza concentra ariba temporada di Cuaresma.

Cu eleccionnan di reina, parada, fiesta y bailenan di maskarada, e isla a tene celebracion di un otro "carnaval" — un periodo di dos dia di fiesta alegre cu ta origina den dianan pre-Cristiano di festival di Saturna ora Romanonan tabata cerra cabez den un fiesta inlimita.

Fiesta di Saturna di Romanonan a worde cambia door di Iglesia di Roma pa un festival di dos dia poco promer cu Diarazon di Shimishi. Durante 48 ora largo, hendenan cu a converti pa iglesia tabata worde permiti pa haci fiesta promer cu cuminza cu ayuno y hacimento di penitencia den Cuaresma.

E ultimo fiestin promer cu Cuaresma celebrá pa residentenan di Aruba y hopi otro islanan den Caribe yama Carnival for di Latin 'carne vale' loke ta nifica "despedida for di carne".

Den Caribe, e fiesta ta representa un mezcla di cultura Europeo y Africano. Esfera di e ocasion ta Europeo; su adorno ta Africano.

Francesnan tabata promer cu a introduci carnaval den Caribe y a pone su celebracion promer cu Cuaresma. Catibonan, cu tabata goza di un grado di libertad, a coi e idea. Originalmente nan a adopta e nomber Frances, Masquerade, pero uso di e palabra aki a muri mas of menos dos generacion pasá.

Ora catibonan a tuma e celebracion over, Europeanonan no tabata dispuesto pa asocia nan mes cu e evenemento. Consecuentemente, influencia di e catibonan Africano a bira predominante.

E influencia aki tabatin su origen den dos costumber peculiar na e multitud di plantacionnan na Trinidad. Nan tabata weganan inter-plantacion y combate di candela.

Den e competicion inter-plantacion tabatin wega di estafette, baile y cancion — cantica di guerra, di trabao y di fiesta. Esfera di e fiesta tabata alegre.

Ora socede un candela na un plantacion, catibonan di e plantacionnan den vecindario tabata acudi pa yuda combati e incendio. Tabata un paso facil for di e weganan y procesionnan di combati candela pa paradanan nocturno na otro evenementonan social.

Celebracionnan Anterior

E weganan di estafette, cancion y baile di e competicion interplantacion y cantamento y marcha di pa-

radanan di combati candela tabata un forma di celebracion di carnaval cla caba ora e catibonan a tuma over.

Nan 'gayabe' of canticanan di trabao a bira calypsonan cu tabata refleha satira y chiste Frances. Nan melodianan 'calinda' a desaroya den bailenan cu a bira standard den carnaval. Nan hungadornan di estafette, for di tempo di catibonan cu tabata combati candela, a bira actuadornan.

Segun carnaval tabata crece den statura social, Europeanonan a bolbe cuminza participa y a introduci e coloroso Pierrots, Colombines, Clowns y diablo of 'jab-jabs'.

Na cambio di siglo 19, e celebracion a haya mas forma y 'conjuntoman' vecindario a cuminza competi den wega di estafette, bistir y baile. Tent di calypso a tuma e social di cas di opera di carnaval.

Maske carnaval ta worde celebrá ainda den algun parti di Europa, America del Sur, America Central y Estados Unidos, su observacion den islanan di Caribe ta peculiar na e islanan aki.

Aya e Europeanonan cu a desaroya e ocasion y e fecha, y e Africanonan cu a desaroya e decoracion y e esfera, a contra y a crea carnaval — e tempo mas alegre di henter anja.

(Material pa e articulo aki a worde prepará pa Charles S. Espinet pa "Esso of the Antilles.")

**Mas Bon Ideas
Ta Worde Sumeti
Cada Anja**

Mas y mas tanto vez Coin Your Ideas Committee ta bisando empleadonan di Lago "Esey ta un bon idea."

Durante 1950, e comité a recibi y a re-investiga 4,984 idea, a procesa 3,508 y a pone 407 of sea 11.6 por ciento den practico.

E siguiente anja e comité a recibi 4,974 sugerencia, a procesa 5,265 (incluyendo resto di anja anterior), y a pone 669 of sea 12.6 por ciento den practico.

Anja pasá e comité a recibi 4,790 idea, a procesa y trata 4393 y a adopta 759 of sea 17.2 por ciento.